

CUNVEGNA DA PRESTAZIUN

traunter

**Sils i.E./Segl, Silvaplauna, San Murezzan, Puntraschigna, Celerina/Schlarigna,
Samedan, Bever,**

La Punt Chamues-ch, Madulain, Zuoz e S-chanf

mincha singula agind scu vschinauncha, rapreschantedas tres lur executivas
cumünelas,

mandantas

e

l'instituziun da dret public «Sanadura» (in fundaziun)

mandataria

concernent

prestaziuns d'ospidel

Preambul

- A. La Fundaziun provedimaint da sandet Engiadin'Ota (SGO/FPS) maina l'ospidel d'Engiadin'Ota a Samedan. La SGO/FPS as rechatta daspö ils 3 december 2025 in moratori. Ad ella mauncharo prubabelmaing la liquidited a la fin da marz 2026.
- B. Insembel cun la preschainta cunvegna da prestaziun vain suottamissa a la votaziun illas vschinaunchas da la regiun da provedimaint da sandet Engiadin'Ota (RPSEO) üna ledscha davart la fundaziun d'ün'instituziun da dret public «Sanadura». La «Sanadura» ho occasiunelmaing il scopo da cumprer aint prestaziuns d'ospidel per la regiun per garantir ün provedimaint speditiv e dastrusch al paziaint da la populaziun e dals giasts da l'Engiadin'Ota.
- C. Quellas vschinaunchas chi approuvan taunt la ledscha davart la fundaziun da l'instituziun da dret public «Sanadura» scu eir la preschainta cunvegna da prestaziun vegnan in seguit numnedas «vschinaunchas purtedras».
- D. Per cha la «Sanadura» possa procurer las prestaziuns necessarias drouva ella ils meds finanziaels da las vschinaunchas purtedras. Cun la preschainta cunvegna da prestaziun vain la «Sanadura» provista culs mezs necessaris per garantir la gestiun transitorica a partir dals 1. avrigl 2026 fin als 31 december 2026. Sainza quista finanziaziun vain serro l'Ospidel d'Engiadin'Ota.

Antecipand que, stipuleschan las parts il seguaint:

1. Champ d'applicaziun e scopo

1.1 Champ d'applicaziun

Quista cunvegna da prestaziun definescha ils böts da prestaziun e la spüerta cha la «Sanadura» dess procurer per las vschinaunchas purtedras.

1.2 Scopo e böts da prestaziun

Il scopo da quista cunvegna da prestaziun es quel da sgürer üna spüerta da prestaziuns medicinicas chi cumpiglia eir in avegnir la garanzia d'ün vast provedimaint da cas urgiant, üna IMC (staziun da survagliaunza specialiseda) cun lets da survagliaunza e la pussibilited da chürer a paziaints cun malatias pü greivas u cun feridas pü greivas, l'agüd a paglioulaintas, spüertas ambulantas da meidis specialisos (per exaimpel consultaziuns angiologia, pneumologia, oncologia) scu eir ün provedimaint da basa per trattamaints da cas urgiant e per trattamaints planisabels. Quists servezzans nu vegnan prastos da la «Sanadura» sves, mabain els vegnan acquistos. Per fer que exista üna cunvegna essenziela traunter la «Sanadura» (in fundaziun) e la gruppa dal KSGR. Cotres dess gnir garantieu ün provedimaint medicinic d'ota qualited in l'Ospidel d'Engiadin'Ota, cun servezzans da sandet i'l sector ambulante e staziunare; pervi da las circumstanzas economicas vain redotta la dimensiun da las prestaziuns.

Quista cunvegna da prestaziun pertuocha il furnitur da prestaziuns Ospidel d'Engiadin'Ota. La gestiun dals centers d'attempo, da la Spitex e dal post da cussagliaziun vegldüna e sandet sun oget da cunvegna da prestaziun separedas.

2. Basa leghela

La preschainta cunvegna da prestaziun as basa essenzielmaing sün la seguainta basa leghela:

- Ledscha davart la sgüraunza d'amalos dals 18 marz 1994 (CS 832.10);
- Ordinaziun davart la sgüraunza d'amalos dals 27 gün 1995 (CS 832.102);
- Ordinaziun dal DFI davart prestaziuns illa sgüraunza da chüra d'amalos obligatorica dals 29 settember 1995 (CS 832.112.31);
- Ordinaziun davart l'eruida dals cuosts e la registraziun da las prestaziuns tres ospidels, chesas da part e chesas da chüra illa sgüraunza d'amalos dals 3 lügl 2002 (CS 832.104);
- Constituziun dal chantun Grischun dals 14 settember 2003 (DG 110.100);
- Ledscha davart la protecziun da la sandet i'l chantun Grischun (ledscha da sandet) dals 2 settember 2016 (DG 500.000);
- Ordinaziun tar la ledscha da sandet (OtLsan) dals 20 gün 2017 (DG 500.010);
- Ordinaziun davart las taxas pel sector da sandet dals 12 avrigl 2011 (DG 500.100);
- Ledscha per promover la chüra da personas amaledas e l'assistenza da personas attempedas e da personas chi haun dabsögn da chüra (Ledscha per promover la chüra da personas amaledas) dals 30 avuost 2017 (DG 506.000);
- Ordinaziun tar la ledscha per promover la chüra da personas amaledas dals 19 december 2017 (DG 506.060);
- scu eir ulteriurs reglamaints respectivs ed ulteriuras directivas respectivs dal chantun Grischun.

Quista cunvegna da prestaziun as basa particulermaing sün l'art. 87 al. 2 da la constituziun chantunela chi prevezza cha'l chantun e las vschinaunchas procuran üna chüra ed ün provedimaint medicinic cunvgnaint, economic e sufficiaint, scu eir sün l'art. 9 al. 2 da la ledscha per promover la chüra da personas amaledas chi prescriba cha'ls purteders dals furnituors da prestaziuns hegian da conceder a las vschinaunchas da lur regiun da provedimaint da sandet ün dret da cogestiun commensuro e cha la regiun da provedimaint da sandet stipulescha per quist intent üna cunvegna da prestaziun culs purteders dals furnituors da prestaziuns. La preschainta cunvegna da prestaziun es da vzair in cumbinaziun cun la ledscha davart la fundaziun da l'instituziun da dret public «Sanadura», particulermaing in vista als drets da cogestiun da las vschinaunchas.

3. Spüerta da prestaziuns

La «Sanadura» s'impegna da procurer las prestaziuns skizzedas in cifra 1.2.

4. Finanziaziun da la spüerta

4.1 Finanziaziun da la gestiun da l'ospidel e contribuziun da las vschinaunchas da la RPSEO

La finanziaziun da la gestiun da l'ospidel as drizza tenor la basa leghela respectiva dal dret federal e chantunel. Tenor quista convegna da prestaziun s'impegnan las vschinaunchas purtedras da pajer las seguaintas contribuziuns a la «Sanadura» per la perioda dals 1. avrigl 2026 fin als 31 december 2026:

- 6.5 milliuns francs per acquirer las prestaziuns da l'ospidel per la perioda dals 1. avrigl 2026 fin als 31 december 2026 tar üna terza part.¹
- 3.5 milliuns francs in fuorma dad imprasts rimbursabels (limitos sün duos ans) per la liquidited necessaria per la gestiun dal terz furnitur da prestaziuns.

Las vschinaunchas purtedras s'impegnan dimena cun la suottascripziun da quista convegna da prestaziun da pajer l'an 2026 lur parts da las contribuziuns a la «Sanadura» in l'otezza da totelmaing 10 milliuns francs.

Il scumpart da las contribuziuns traunter las vschinaunchas da la RPSEO as drizza tenor la clef da repartiziun actuela da la Regiun Malögia sainza la vschinauncha da Bergiaglia.

4.2 Modaliteds da pajamaint

Las vschinaunchas purtedras mettan a disposiziun a la «Sanadura» las contribuziuns scu eir l'impraist pels 1. avrigl 2026.

5. Düreda

La preschainta convegna da prestaziun vain stipuleda per üna düreda fixa a partir dals 1 avrigl 2026 fin als 31 december 2026.

6. Reuschida da quista convegna da prestaziun

Quista convegna da prestaziun es reuschida in relaziun directa traunter la vschinauncha da *** e l'instituziun da dret public «Sanadura», scha in möd cumulativ

- l'approuvan almain set vschinaunchas da la RPSEO, illas quelas abita al listess mumaint la magiurited da la populaziun cun domicil stabel da las vschinaunchas da la RPSEO confuorm a l'ultima statistica da populaziun ufficiela STATPOP disponibla; e scha
- vain realiseda la ledscha davart l'instituziun da dret public «Sanadura»; e scha
- la vschinauncha da *** approuva la ledscha davart l'instituziun da dret public «Sanadura».

7. Clausula da nullited parziela

In cas cha singulas disposiziuns da quista convegna da prestaziun as muossan scu annulledas u giuridicamaing invalablas, sun u dvaintan impossiblas, nu tanghescha que bricha la validited da las ulteriuoras

¹ Ad es già avaunt maun üna convegna essenziela traunter la Sanadura (in fundaziun) ed üna societad chi tuocha tar la gruppa dal KSGR.

disposiziuns. Il medem vela per üna luocha da la reglamentaziun. Las parts as sfadian in ün tel cas da rimplizzer las disposiziuns annulladas, invalablas u impussiblas tres reglamentaziuns specielas u d'implir telmaing la luocha da reglamentaziun cha il scopo intenziuno cumünaivelmaing po gnir raggiunt.

8. Dret applichabel ed istanza güdiciela

Sün la preschainta curvegna da prestaziun es exclusivmaing applichabel il dret svizzer. Scu lö d'istanza güdiciela vela Samedan.